

Govor zamjenika predsjedatelja Doma naroda Parlamentarne skupštine Bosne i Hercegovine Staše Košarca na komemorativnoj sjednici u povodu smrti zamjenika predsjedatelja Doma naroda Sulejmana Tihića

Poštovani članovi porodice Tihić, uvaženi članovi Predsjedništva, kolege poslanici i delegati, ministri, vaše ekselencije ambasadori, predstavnici međunarodnih organizacija, dame i gospodo,

Sa ovog svijeta otišao je gospodin Sulejman Tihić, s kojim sam u posljednjih nekoliko godina sarađivao u Kolegijumu Doma naroda Parlamentarne skupštine BiH, nekadašnji član Predsjedništva BiH i potpredsjednik Narodne skupštine Republike Srpske, lider Stranke demokratske akcije. I mogli bismo nabrojati mnogo funkcija i dužnosti koje je gospodin Tihić uspješno obavljao tokom svoje, nažalost, prerano okončane karijere, ali ne bismo do kraja rekli suštinu onoga što je on zaista bio. A bio je, jednostavno rečeno, dobar čovjek.

Nije lako biti dobar čovjek u lošim vremenima, kakva u Bosni i Hercegovini živimo duže od dvije decenije. Zato smo smrću gospodina Tihića izgubili svi – njegova porodica, za koju je to nenadoknativ gubitak, njegovi prijatelji i saradnici u partiji koju je vodio, i mi kolege parlamentarci, koji ćemo ga pamtiti kao čovjeka dijaloga i kompromisa, ali i političara koji se uporno, strpljivo i hrabro borio za svoje stavove, za političke ciljeve svoje stranke i naroda.

Za dijalog i kompromis u ovoj zemlji treba imati volju, snagu i hrabrost. Gospodin Tihić imao je sve to, pa i više od toga. Bio je jedan od rijetkih političkih lidera u BiH čije su riječi pažljivo slušali i poštovali svi, pa i oni koji se s njegovim političkim stavovima nisu slagali. Zato će gospodin Tihić ostati upamćen i kao čovjek stabilnosti koju je svojim predanim radom unosi u institucije ove zemlje.

Iskreno žalim zbog smrti gospodina Tihića i njegovoj porodici i prijateljima upućujem izraze najdubljeg saučešća. Opraštajući se od ovog dobrog čovjeka želim da u svom rodnom gradu počiva u miru, miru za koji se svesrdno zalagao i predano radio cijelog svog života.